



## LIBER TERTIVS.

## Membrum I.

*De causa Meteororum formalis.*

## Caput I. Membri I.

*Causam Meteororum utriusque mundi, formalem simul atque ipsorum differentias, ad amissim tractat.*



Vm in libro præcedente, de materiali meteororum utriusque mundi origine, satis superque (vti nobis videtur) disceptauerimus, de causa ipsorum formalis aliquid, licet paucis & succincte discurrere, methodi certioris gratia hoc in loco mihi propositum est. Ut igitur causam illam meteororum materialem esse illam, ex qua tanquam parte substanciali meteora omnia sunt conflata, in prædictis declarauimus, videlicet, ex subiecto aeris tenuiori, magis minusue secundum meteori conditionem contracto atque coarctato, ita etiam causam ipsorum formalem eam esse affirmamus, per quam meteora illa, quoad existentiam, materialem, ab vniuersa & invisibili aeris mundani congerie sic exsculpta, seu delineata, hoc est, in actum visibilem producta, nomen & essentiam peculiarem sibi vendicant; utpote quæ hunc vel illum fumum aereum variis atque diuersis figuris, ab inuicem differentibus, ornare & vestire seu figurare solet; quæ quidem effigierum seu imaginum diuersitas, à forma meteororum occulta & interna prouenire docetur, non aliter, quam hominis ico seu figura externa ab interna ipsius essentia, ei soli appropriata procedens, eius fabricam ab illa cæterorum animalium atque vegetabilium discrepare facit, quahunc vel illum hominem neque brutum esse, neque plantam, de longo cognoscimus. Simili plane ratione seu differentia, colligimus & distinguimus meteoron tenebrosum à lucido, hoc est, speciem à specie, atque iterum respectu magis peculiari, lucidum à lucido, & opacum seu tenebrosum à tenebroso, verbi gratia, cometam vel fulgur, vel lanceam, seu columnam ardente, à nube, nebula, halone, rore, distingui atque differre obseruamus, atque etiam in eadem regione seu specie, cometam à columna ardente, aut à fulgure, eadem differentia formalis variare videimus, similiter in regno tenebroso, etiam oculus vulgaris discernit, nubem discrepare à nebula, & nebulam à rore, & pluviā à pruina &c. Hinc ergo est, quod in hoc nostro tractatu, mediantibus causis formalibus, meteora primum in sua genera, deinde illa in suas species, ac illas tandem, variis subdivisionibus factis, in infinita individua distribuimus, non aliter quam arboris truncum in ramos, atque illos iterum in subdivisiones ramulos, qui tandem in virgulas distinguitur, partiri cernimus, quo facilitiore methodo ad intentionis nostræ scopum perueniatis.

Et quoniam nostrum nos dicit in hoc præsentis tractatu institutum, meteora mundi maioris cum illis mundi minoris, seu ipsius hominis, conferre, quo sanitatis vel infirmitatis eius rationem, per bonorum aut malorum meteororum in illo generatorum effectus, liquidius demonstrare queamus, ideo per totum progressionis huiuscemus nostræ filum, post quodlibet de meteoris Macrocosmi caput, correlationem & comparationem fecimus; inter membra capitinis præcedentis, & illa Microcosmi seu hominis, applicando scilicet meteora, humores & proprietates vnius illis alterius, prout subiectum atque occasio tractanda se offert.

CAP.